

ACCION★21
PLAN DI
PARTIDO★
2025 - 2029

#BanBibaMiho
WWW.ACCION21.COM

CONTENIDO

PARLAMENTO DI ARUBA	4
Democratiza autoridad den parlamento	5
Presidium	5
Independisacion real	6
Parlamento cu ta controla Gobierno	6
Segundo griffier	7
Mehora administracion y operacion	7
Aumenta cantidad di wetgevingsjurist	8
Reduci gastonan di biahe	8
Elimina exceso	8
Transparencia	8
Comisionnan	9
Comunicacion	9
Publicacion di notula	9
Legislacion di Accion21	10
Otro legislacion pa introduci	13
Nombramento di Minister	14
Maximo cantidad di personal na Bureau di Minister	14
Adapta con presupuesto ta ser controla	14
Introduci referendum consultativo	15
Mehora ley di screening pa Minister	15
Mehora ley di financiamiento di partido politico	15
Introduci un klokkenluidersverordening	16
Introduci un ley di archivo	16
Introduci un ley pa proteccion di dato personal	16
Introduci un ley di transparencia - 'Open Government'	16

#BanBibaMiho
WWW.ACCION21.COM

PARLAMENTO DI ARUBA

Independisa parlamento di ministerio di asunto general y transforma e instituto mas halto di nos orden constitucional den un berdadero representacion di pueblo su boluntad democratico. Durante e ultimo 38 aña cu Aruba ta existi como un pais constituyente di Reino Hulandes, parlamento a funciona como un simpel formalidad constitucional. Democracia no por funciona debidamente sin un organo legislativo capaz y ekipa pa eherce su tareanan di representa e electorado, aproba ley y supervisa gobernacion.

DEMOCRATISA AUTORIDAD DEN PARLAMENTO

Actualmente nos constitucion y reglamento di ordo di parlamento ta otorga demasiado poder na e presidente. Presidente di parlamento tin absoluto discrecion si y cua reunion ta wordo yama, den ki forma y na ki momento. Violacion di nos reglamento di ordo di parlamento a bira structural y historia ta demostra cu presidente su poder ta wordo abusa categoricamente pa faborece su partido.

Den parlamento su independisacion ta importante pa democratisa y comparti e poder cu actualmente presidente di parlamento ta goza di dje door di cambianan na constitucion y reglamento di ordo di parlamento. Siguiendo e ehempel di Spaña caminda un 'Mesa del Congreso' ta encarga cu e autoridad y responsabilidad di presidente di parlamento, nos ta propone reemplasa 'Commissie Huishoudelijke Aangelegenheden (CHA)' cu un presidium.

PRESIDIUM

Presidium lo ta e organo rector di parlamento y lo consisti di presidente, prome vice-presidente, segundo vice-presidente y secretarionan. E cantidad di miembro di presidium lo coresponde na e cantidad di fraccion presente durante un periodo parlamentario. Cada

fraccion lo tin derecho na un miembro di presidium, cada miembro lo conta cu un voto igual y presidente lo por unicamente vota den caso di empate. Miembronan independiente lo por participa den presidium como observador sin derecho di voto. Presidium lo reuni e prome dialuna di tur luna excluyendo periodo di reces y presidente lo dirigi y coordina accion.

Tareanan di presidium lo inclui:

- Adopta decision y medida rekeri pa e organizacion di trabao y funcionamiento interno di parlamento;
- Prepara e presupuesto di parlamento, dirigi y controla su ehecucion y presenta na un sesion plenario dentro di seis luna despues di cada aña presupuestario, un rapport riba su cumplimiento;
- Ordena gastonan di parlamento sin prehuicio na ningun subsidio di fraccion acorda;
- Programa lineanan di accion di parlamento, establece e calendario di actividadnan di plenario y reunionnan di comision pa cada periodo di sesion.

Adaptacion necesario di constitucion y reglamento di ordo di parlamento por ser modifica tras di articulonan 30-38 di 'Congreso de los Diputados (Reino de España) | Normas | Reglamento del Congreso | TITULO III. De la Organización del Congreso ¹'

¹ <https://www.congreso.es/es/cem/tit3cao1sec2>

INDEPENDISACION REAL

Actualmente minister president tin e autoridad pa disolve parlamento aunke esaki mester wordo aproba pa gobernador. Na 2015 a sosode un impasse constitucional na Sint Maarten cu a delinea un defecto den nos sistemanan constitucional. Parlamento di Sint Maarten a aproba un mocion di desconfiansa contra e gobierno y algun ora despues minister president a disolve parlamento. Gobernador a exige premier entrega retiro di su gabinete prome y ela nenga te ora parlamento ta disolvi. Diferente expertonan constitucional renombra a conclui na favor di e premier, cu consecuencia premier por exige disolucion di parlamento despues cu parlamento ya caba a pasa un mocion di desconfiansa y manda gobierno cas.

Primicia di parlamento no ta real si premier ta mantene autoridad pa disolve su existencia. Aruba su parlamento ta unicameral y pa garantiza su independencia di gobierno, ta importante pa elimina e menasa di disolucion pa minister president. Tambe ta importante pa bon maneho di un pais pa gobierno conta cu un mayoria den parlamento y si esey no ta posibel pa eleccion tuma luga dentro di un periodo cortico.

Constitucion di Noruega ta prohibi disolucion di parlamento prome cu ela

sirbi su termino completo y paisnan manera Indonesia a modifica nan constitucion pa kita posibilidad di disolve parlamento. Nos no kier bay asina leu pero kier haya un caminda intermedio cu ta garantiza seguridad di parlamento y gobernabilidad di pais. Siguiendo e ehempel di e 'Fixed-term Parliaments Act' di Reino Unido, nos kier modifica constitucion pa inclui cu un eleccion por unicamente sosode trempan si:

- Un mayoria cualifica di dos tercera parti di miembro vota na favor;
- Of si gobierno perde un mocion di desconfiansa y ningun formacion alternativo ser confirma pa parlamento dentro di tres siman.

PARLAMENTO CU TA CONTROLA GOBIERNO

Na Aruba nos conoce e fenomeno di stempel parlementcuta binta caracteriza nos pais desde cuminsamento. Ta custumber cu candidatonan politico cu mas voto ta procede pa bira minister y esnan cu resta ta keda parlamento, creando un desekilibrio di poder entre e ministernan di un partido y nan fraccion parlamentario. Fuera di esey, ser minister ta considera mas prestigioso, tin mas privilegio y ta miho paga, dus aunke candidatonan ta postula pa parlamento, esnan mas existoso kier bira minister. Esaki hopi biaha a resulta den ministernan sin conocimiento y preparacion suficiente den e cartera(nan)

di nan ministerio.

Stichting Deugdelijk Bestuur Aruba (SDBA) a yega di propone un simposio nacional pa discuti cambionan na nos sistema democratico. Nos ta apoya e iniciativa y lo percura pa gobierno organisa un evento caminda tur ciudadano, organizacion politico, gremio, sindicato etc. lo por bin cu proposicion pa discuti con pa adapta nos sistema democratico.

Den un simposio nacional nos lo kier discuti cambionan fundamental na nos democracia, incluyendo eleccion separa pa parlamento y gobierno. Elegi minister president y/of otro ministernan directamente lo por yuda kibra e partidismo divisivo cu ainda ta sigui existi mirando cu ta mas probabel cu lo tin mas partido representa den conseho di minister y tambe ofrece miho garantia cu esnan mas cualifica pa e funcion lo haya e puesto.

SEGUNDO GRIFFIER

Griffier ta conseha parlamento, presidente y presidium riba aspectonan constitucional y di procedura relaciona cu trabao di parlamento. Tambe e ta hefe di empleadonan publico di parlamento y su neutralidad politico ta esencial. Historia ta demostra cu no semper e empleado publico di mas halto a actua di un forma integro cu fondonan publico ni tampoco di un forma politicamente imparcial na momentonan di desacuerdo. Mirando e embergadura di e posicion, nos ta

propone busca un segundo griffier pa sostene parlamento den su totalidad. Practica ta muestra cu griffier hopi biaha sa identifica su rol como consehero legal di presidente, lubidando cu su prome responsabilidad ta na parlamento henter. Ta importante pa tur miembro tin acceso adecua na conseho legal y un solo persona no por brinda esey di un forma satisfactorio, specialmente ora e ta carece di imparcialidad politico suficiente.

MEHORA ADMINISTRACION Y OPERACION

Actualmente administracion y operacion di parlamento ta deficiente den hopi aspecto. Nos lo kier mira un estudio independiente pa actualisa parlamento su plan di formacion y percura cu personal di parlamento ta completo. E administracion y facilidadnan mester ta miho prepara pa oportunidad y retonan di siglo 21. Parlamento por haci mas uso di digitalizacion pa mehora eficiencia y aumenta transparencia. Facilidadnan mester ta apto pa necesidadnan actual di parlamento, no ta aceptabel p.e. cu no tin fractiekamer pa tur fraccion adhunto sala. Manera otro partinan di Reino, mester introduci un orientacion pa miembronan nobo hunto cu kennismaking pa personal. Reparticion di oficina, prioridad di peticion, acceso na notula y asistencia di personal mester sosode di un forma democratico y imparcial.

AUMENTA CANTIDAD DI WETGEVINGSJURIST

Actualmente parlamento tin unicamente un wetgevingsjurist y esey no ta su unico tarea. Miembronan no ta ricibi asistencia suficiente pa introduci, modifica y repasa proyectonan di ley. Mirando cu parlamento ta co-legislador, ta importante pa tin mas capacidad di wetgeving na parlamento mes. Nos lo kier mira por lo menos un wetgevingsjurist pa cada fraccion pa parlamento no mester depende riba Directie Wetgeving en Juridische Zaken (DWJZ) cu tambe ta sufri di un falta di capacidad y personal pa preparacion y adaptacion di leyman.

REDUCI GASTONAN DI BIAHE

Actualmente tin abuso di parti miembronan y gastonan di biahe di parlamento ta incrementa sin cu e gastonan mas halto ta trece beneficio pa pais Aruba. Manera tur otro parti di Reino (Corsou, Sint Maarten, Eerste Kamer y Tweede Kamer), nos lo kier mira limitacion di un delegado pa fraccion, presidente y griffier na reunionnan di IPKO, Tripartiet y InterExpo. Otro miembronan lo por asisti riba nan propio gasto of riba gasto di nan fraccion como observador manera ta e caso na tur otro parti di Reino.

Limita parlamentarionan na miembrecia den unicamente un comision fiho di Parlatino. Limita asistencia presencial na reunionnan di Parlatino na maximo dos

miembro pa cada comision, si tin mas cu dos miembro den un comision ta alterna segun prome letter di fam manera ta e caso na Sint Maarten. Limita asistencia na asamblea general di Parlatino na dos miembro di presidium, presidente y griffier. Mescos cu reunionnan di comision di Parlatino, ta alterna segun prome letter di fam.

Prohibi griffier di asisti biahenan caminda conseho legal no ta necesario manera p.e. celebracion dia di bandera di Corsou.

ELIMINA EXCESO

Presidente di parlamento, mescos cu minister, por haci uso di su propio vehiculo, ta cancela leasemento di auto pa presidente.

Ta elimina pidimento di cuminda durante reunion publico pa miembronan, ministernan y conseheronan. Trahadonan publico ta gana suficiente pa financia nan propio cuminda durante suspension pa come y asina ta elimina tambe e faboremiento di sostenedo di e partido na mando cu contract di catering.

TRANSPARENCIA

Siguiendo ehempel di Corsou, ta implementa hopi dierecomendacionnan di rapportnan existente pa mehora funcionamiento di parlamento y brinda mas transparencia. Nos ta propone haci

tur reunion di comision publico y ora ta trata un topico sensitivo dos tercera parti di miembronan di comision mester aproba pa haci e reunion secreto. Segun recomendacion di rapportnan haci, nos ta kere den rekeri un quorum pa reunionnan di comision central manera ta e caso na Corsou y haci nan publico.

COMISIONNAN

E miho garantia pa continuidad di maneho ta e comisionnan fiho di parlamento pero actualmente nan no ta funciona debidamente, tin cu nunca a reuni. Nos lo kier mira eleccion pa presidente y vice-presidente pa tur comision cu candidatonan splicando nan vision y plannan pa e comision prome cu ser elegi presidente y vice-presidente manera ta e caso na Corsou. Mescos cu presidium, nos ta propone pa tur comision tin un fecha fiho pa luna riba cual nan ta reuni cu posibilidad di agenda reunionnan extraordinario. Eligiendo presidente y vice-presidente di comisionnan a base di conocimiento y plannan lo mehora nan funcionamiento y percura pa nan opera di un forma proactivo.

COMUNICACION

E trabaonan di Parlamento di Aruba ta desconoci pa gran parti di nos poblacion, contrario na gobierno, no tin un maneho di comunicacion y no ta haci bon uso di e canal di television of radio di parlamento. Nos ta propone desaroya un maneho di

comunicacion structural cu ta haci miho uso di e recursonan di comunicacion di parlamento incluyendo su paginanan di media social. Parlamento ta e cas di pueblo y ta nos deber informa e votado kiko su representantenan eligi ta haciendo, pakiko e ta importante y con decisionnan tuma den parlamento lo afecta nan bida. Nos ta propone tambe pa fraccionnan haya acceso na canalnan di parlamento pa trece dilanti nan punto di bista riba leyman pendiente pa pueblo ta miho informa di e posicion cu su representantenan eligi ta tuma riba legislacion.

PUBLICACION DI NOTULA

Actualmente miembronan no tin acceso facil na notula di reunionnan di comision. Despues di nos proposicion pa haci reunionnan di comision publico, ta unicamente presidium lo depende riba notula di griffier. Nos ta propone cu na comienso di tur reunion di presidium, miembronan mester aproba e notula di e reunion anterior presenta pa griffier hunto cu publicacion di e opdracht pa reunion. Asina por garantiza cu notula claro y corecto ta existi y facilmente accesibel pa miembronan y nos lo kier mira nan comparti publicamente tambe. Actualmente cantidad di decision ta ser tuma den CHA pero nunca ta ser implementa of ehecuta y ora ta pidi notula esakinan nunca ta disponibel y esey no ta un administracion aceptabel di e organo mas halto.

LEGISLACION DI ACCION21

Ouderschapsverlof (Verlof pa embaraso y mayornan nobo) ta inclui e siguiente cambianan:

- Extende verlof pa mamanan nobo di 12 pa 16 siman (comparabel cu Hulanda y BES);
- Reduci e tempo di notificacion cu un empleado embarasa mester duna su dunado di trabao pa verlof prome cu nacemento pa 6 siman luga di dos luna actualmente, treciendo nos mas cerca di Hulanda y BES;
- Si un baby wordo hospitalisa durante e periodo di verlof, e dianan hospitalisa no ta conta den dianan di verlof (comparabel cu Hulanda y BES);
- Si e mama fayece durante parto, su tempo liber ta pasa pa su casa/pareha of e persona cu tabata biba cu e mama of cu a reconoce e baby como di nan. Esaki ta un innovacion cu Aruba lo ta e prome den Reino pa introduci;
- Verlof pa tata ta subi for di 2 dia te cu 5 dia pa parehanan registra y personanan cu ta bibando cu e mama, of persona cu a reconoce e baby como di nan. Esaki lo trece nos leyman den concordancia cu e minimo recomienda pa International Labor Organization (ILO);
- Tatanan/parehanan ta haya oportunidad pa tuma cinco (5) siman adicional di verlof durante e prome seis lunanan despues di nacemento cu setena (70) porciento di nan salario sin cu esaki ta hisa gastonan

pa dunado di trabao (comparabel cu Hulanda y BES).

E iniciativa di ley a haya su conseho di Raad van Advies y awor ta pendiente cierto modificacionnan pa e ser presenta den sala di parlamento pa debate y votacion.

Kiesverordening (Ley electoral)

- Introduci derecho di voto pa Arubano bibando den exterior (comparabel cu Hulanda);
- Reforma sistema di restzetels, si un partido yega 75% di kiesdeler e por bin na remarca pa e prome restzetel y despues cu cada partido cu a logra un asiento haya un restzetel, e ora partidonan cu a yega 50% di kiesdeler por bin na remarca pa cualkier restzetel restando (comparabel cu BES);
- Reforma voto preferencial pa e candidatonan cu mas voto riba un lista procede pa parlamento (comparabel cu Sint Maarten);
- Introduci pre-eleccion/eleccion primario manera ta e caso na Corsou. Dos siman despues di entregamento di lista riba un dias abray dia domingo lo tene eleccion primario pa partidonan no representa den parlamento. Durante dos dia e partidonan lo mester haya sosten di voto igual na un (1) porciento di cantidad di voto den eleccion anterior pa cualifica pa participa den eleccion parlamentario. Esaki ta reduci e cantidad di voto no

representa den parlamento y preveni cu partidonan ta mal usa nos leyman door di manda sostenedo ofrece sosten ficticio na partidonan cu no lo cualfica, pa aumenta e cantidad di restzetels;

- Introduci limite di termino pa parlamentario, minister y minister president. Nos ley di reforma electoral lo introduci un limite di termino di diesdos (12) aña pa parlamentario. Pa minister y minister president, lo introduci un limite di termino di ocho (8) aña respectivamente. Ta importante pa tin renobacion constante den politica y nos ta kere cu limite di termino ta un herment util pa garantisa esaki.


Estudionan científico a base di muestranan aleatoria (random sample) haci na 2021 y 2022 a conclui cu:

Setenta (70) porciento di residente di Aruba cu nacionalidad Hulandes y derecho di voto ta sostiene extende derecho di voto pa Arubanonan den exterior.

Duna Arubianonan den exterior derecho di vota.

70% di esnan entrevista ta na favor di duna derecho di voto na Arubianonan den exterior cu 3 di cada 10 ta pensa lo contrario.

Bo ta na favor di...?




n=1,200

Ochentitres (83) porciento di residente di Aruba cu nacionalidad Hulandes y derecho di voto ta sostene reforma e sistema di voto preferencial pa esnan cu mas voto riba un lista procede pa parlamento.

Sesentinuebe (69) porciento di residente di Aruba cu nacionalidad Hulandes y derecho di voto ta sostene limite di termino pa minister y parlamentario. Cincuentitres (53) porciento di residente di Aruba cu nacionalidad Hulandes y derecho di voto ta sostene reforma nos sistema di restzetels.

SITUACION - Na favor of contra
Bo ta na favor of contra di...?



ARUBA, JANUARI-FEBRUARI 2021. n=1,529

Eleccionnan regular, liber y husto ta e fundeshi di un democracia y ta brinda e votadonan un oportunidad pa influencia direccion di su pais y consecuentemente su bida. E iniciativa di ley ta na Raad van Advies y ta spera nan conseho pa por haci cualkier modificacion pa e ser presenta den sala di parlamento pa debate y votacion.

Codificacion cassatie arrest 12 jul 2024 Land Aruba vs Fundacion Orguyo (openstelling huwelijk)

ACCION21 lo procede cu codificacion di e cassatie arrest di Hoge Raad cu a habri

matrimonio pa parehanan di mesun sexo a base di e iniciativa di ley cu nos a presenta den parlamento. Actualmente parehanan di mesun sexo por casa y ta goza di tur derecho, mescos cu un pareha di sexo opuesto. Sinembargo tin parehanan cu a forma un union civil (geregistreerd partnerschap) prome cu matrimonio a bira legal y awor kier converti nan union civil den un matrimonio. Awor aki esaki ta unicamente posibel si e pareha divorcia y disolve nan union civil pa despues casa bek. Codificacion di e veredicto segun e iniciativa di ley presenta pa ACCION21 lo

permiti parehanan di mesun sexo den un union civil (geregistreerd partnerschap) cu a tuma luga prome cu matrimonio a bira legal, simplemente converti nan union den un matrimonio civil.

OTRO LEGISLACION PA INTRODUCI

Stabilisa LIM (landsverordening instelling ministeries)

Raad van Advies y otro instancia ta recomenda stabilisa e distribuimento di ministerio y portfolio conoci como e LIM, landsverordening instelling ministeries. Contrario na otro parti di Reino, Aruba a desaroya custumber di cambia distribuimento di ministerio y cartera cu cada gobernacion. Aunke parlamento a crea un comision pa hancra e LIM, nunca ela reuni. ACCION21 ta kere e ta importante pa hancra e LIM den nos constitucion pa haci'e mas permanente. Stabilisa e LIM lo hiba na un miho bista y control di carteranan/departamentonan y haci'e mas facil pa parlamento no solamente controla resultado di maneho pero tambe gastonan.

Raad van Advies tin un consejo pa dividi ministerionan den e siguiente manera: Asunto General; Finanzas; Desaroyo Teritorial, Vivienda y Medio Ambiente; Asunto Economico, Turismo y Transporte; Salubridad, Asunto Social y Labor; Husticia; Enseñasa y Cultura. Nos a studia diferente modelo di gobernacion, di esnan mas eficiente manera Singapore y Monaco y di diferente small island developing states (SIDS). Directie Financien tambe a yega

di haci un estudio di con pa organisa gobierno di un forma mas eficiente y nan tambe ta conclui cu un gobierno di cinco minister ta optimal. Nos reparticion di ministerio y nan reponsabilidadnan ta lo siguiente:

- **Minister President y Minister di Asunto General**

Asunto di Reino y relacion internacional; Siguridad nacional; Maneho y informacion; Documentacion, automatizacion y digitalisacion; Integridad; Administracion y unidad di maneho; Organizacion gubernamental; Personal; Censo, HBK y MFA; Preveni desaster y responde; Funcionamento democratico; Representacion procedura legal; Otro asunto administrativo;

- **Minister di Finanzas**

Asunto financiero y fiscal; Entrada y gasto di pais; Transaccion debe publico; Integridad sector financiero; Participacion compania publico y semi-publico; Presupuesto y uzo eficiente di recurso; Patrimonio bienes movibel y inmovibel; Imposicion y recaudacion impuesto; Representacion pais accionista; Otro asunto financiero;

- **Minister di Husticia**

Orden publico y siguridad; Polis; Brandweer; Casino; Inmigracion y integracion; Cumplimento cu ley; Control di frontera; Corte; Prison;

Legislacion gobierno; Otro asunto ordo y siguridad;

- **Minister di Bienestar Humano**

Enseñasa; Ciencia; Innovacion; Reentrenamiento y enseñasa continuo; Cultura; Cuido di mucha y traimer dia; Biblioteca; Salubridad publico; Seguro social y nacional; Asunto social; Labor; Salud mental; Adicción; Tratamiento ortopedagogico; Famia; Monumento; Centro di barrio; Deporte; Adulto mayor incluyendo cuido; Cuido cronico; Recreacion; Proteccion social;

- **Minister di Economía, Infraestructura y Medio Ambiente**

Crece y diversifica economía; Turismo; Conservacion; Huur y consumidor; Desarrollo sostenibel; Estadística; Awa; Propiedad intelectual; Recurso natural; Comunicacion; Post; Aviacion; Navegacion; Transporte publico; Agricultura, pesca y ganado; Energia; Comercio; Desperdicio; Riool y Polucion; Biodiversidad; Naturalesa; Infraestructura; Vivienda; Inspeccion tecnico; Conservacion.

NOMBRAMIENTO DI MINISTER

Nos kier introduci un functie omschrijven, opleidingsvereisten y niveauvereisten pa minister cu por ser añadi na e LIM of den e ley di screening pa sigura profesionalismo, conocimiento y

capacidad di nos mandatarionan. Esaki lo trece un mihobalansa entre vision politico y obhetividad ora di nombramento pa minister cu parlamento por usa tambe pa guia su confirmacion.

MAXIMO CANTIDAD DI PERSONAL NA BUREAU DI MINISTER

Actualmente gobierno su maneho ta limita cantidad di personal na bureau di un minister te cu 25 persona pero e no ta hancra den ley. Un minister ya caba tin diferente departamento completo na su disposicion cu lo por yuda implementa su maneho. Nos ta pensa ta importante hancra den ley un cantidad maximo di personal cu un minister por tin den su bureau, ACCION21 lo kier mira un reduccion den cantidad di personal pa cada minister.

ADAPTA CON PRESUPUESTO TA SER CONTROLA

Segun constitucion presupuesto mester keda entrega tur aña cuminsamento di september y aproba prome cu fin di aña. Esaki ta pa duna parlamento tempo suficiente pa repasa e documento y reuni den comisionnan cu hefenan di departamento y ministernan concerni. Den practica parlamento no ta haya un presupuesto detaya suficiente pa por p.e. introduci un amienda y tampoco e comisionnan fiho di parlamento ta reuni riba presupuesto segun nan cartera p.e.

enseñansa cu Director di Departamento di Enseñansa. Ta importante pa hancra control y proceso di tratamiento di presupuesto di un forma mas formal y fiho cu ta garantiza cu parlamento den comisionnan fiho ta logra reuni cu tur hefe di departamento concerni pa discuti topiconan specifico relata na presupuesto.

INTRODUCI REFERENDUM CONSULTATIVO

Como un partido liberal progresivo nos ta kere den podera nos ciudadanonan, incluyendo introduccion di referendum consultativo. Actualmente tin un concepto di ley pa introduci referendum pero e concepto ta inclui referendum unicamente ora un mayoria den parlamento aproba. Nos kier introduci referendum cu por ser yama directamente pa pueblo, si p.e. dies (10) porciento di electorado den ultimo eleccion firma pa un referendum consultativo. Nos kier pa e tuma luga independiente di si un mayoria den parlamento aproba of no. Eventualmente nos kier adopta un sistema manera Suiza cu ta organisa referendum decisivo tambe y cu cuatro biaha pa aña ta tene referendum riba topiconan di importancia pa pueblo.

Ta importante nota cu un referendum consultativo manera actualmente proponi den e concepto entrega na parlamento pa fraccion MEP lo duna pueblo e oportunidad di opina pero NO dicidi si e keda aproba. Derechonan constitucional no por ser cambia a base

di un referendum y nos partido lo para firme contra manipulacion di pueblo cu engaño.

MEHORA LEY DI SCREENING PA MINISTER

Actualmente ta unicamente minister president ta repasa resultado di screening pa minister y screening di su persona ta ser repasa pa presidente di un colegio halto di estado. E resultado di screening ta ser warda na Gabinete di Gobernador y den pasado hopi nombramento dudoso a tuma luga. Ta importante pa democratiza e proceso y permiti lidernan di fraccion acceso na e screening di minister y trece cualkier preocupacion dilanti cu gobernador mientras ta salvaguardia privacidad di e candidatonan.

MEHORA LEY DI FINANCIAMENTO DI PARTIDO POLITICO

Actualmente nos ley di financiamiento di partido no ta funciona adecuadamente, rifa por ehempel no ta regula. Limite di 30.000,- pa partido y 20.000,- pa candidato por facilmente wordo supera door di haci donacion door di diferente compania (di mesun doño) of diferente miembro di mesun famia. Prestamo na partido politico no ta regula dus tanto un instituto financiero, un empresa of individuo por presta fondo na un partido superando e limitenan y den añanan venidero converti e prestamo den un donacion. ACCION21 lo kier mira eleccion financia completamente cu

fondonan publico, asina sacando placa priva fe politica y eliminando un conflicto di interes grandi. Parti di e fondonan aloca pa eleccion mester ser distribui igualmente entre partidonan y un otro parti segun sosten na ultimo eleccion.

INTRODUCI UN KLOKKENLUIDERSVERORDENING - 'WHISTLEBLOWER PROTECTION ACT'

Provee klokkenluiders cu proteccion fuerte contra persecucion vengativo ta importante pa curasha denuncia y fortifica efectividad di nos leyman.

INTRODUCI UN LEY DI ARCHIVO

Pa introduci digitalisacion di tur nos documentonan ta importante pa tin un ley cu ta determina ken ta encarga cu maneho di e documentonan y ken ta responsabel pa e documentonan. Mester introduci un ley di archivo pa por regula y defini e procesonan aki y pa sigura e.o. un transicion mas facil y completo di gobernacion.

INTRODUCI UN LEY PA PROTECCION DI DATO PERSONAL

Segun seccion H.9 di landspakket, paisnan di Reino lo traha hunto pa un nivel di proteccion harmonisa di dato personal den Reino den forma di un rijkswet, ley di Reino. Aunke tin un acuerdo gubernamental, nos fraccion a

pidi pa e ley ser diseña di un forma cu e datonan ta cumpli cu otro normanan manera e.o. pa transaccion financiero. Ta importante pa e dato ta util y accesibel unicamente cu e consentimiento di e ciudadano pa p.e. habri un cuenta di banco y otro transaccionnan cu mester cumpli cu compliance. E concepto actual, riba cual parlamento a haya un presentacion no a ser acopla na otro tratado y normanan pa haci bida di e ciudadano mas facil, un oportunidad perdi den opinion di nos partido cu ainda por wordo coregi.

INTRODUCI UN LEY DI TRANSPARENCIA – 'OPEN GOVERNMENT'

Ta importante introduci un ley cu ta obliga gobierno y parlamento publica y haci accesibel tur documento publico den un termino cortico via nan respectivo websitenan. Esaki no ta unicamente garantisamiho transparencia pero tambe aumenta confiansa den comunidad pa sector publico su operacion. Un ministerio di gobierno saliente a cuminsa publica via un website opera pa su ministerio pero sin hancra esaki den ley of door di sistemanan digital di gobierno dus su continuidad no ta sigura. Mester introduci un cuadro legal cu ta garantisamiho esaki pa tur ministerio y parlamento. Gobierno y parlamento mester actualisa nan website diariamente cu tur documentacion y grabacion pa mehora accesibilidad na informacion.

#BanBibaMiho
WWW.ACCION21.COM

ACCION★21
PLAN DI
PARTIDO★
2025 - 2029

#BanBibaMiho
WWW.ACCION21.COM